

四庫全書

集部

欽定四庫全書

集部  
宋詩鈔卷四十五

詳校官中書<sub>臣</sub>賈鏐

主事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>劉源溥

謄錄監生<sub>臣</sub>鄭家屏

欽定四庫全書

宋詩鈔卷四十四

內閣中書舍人吳之振編

李覲盱江集鈔

李覲字泰伯南城人舉茂才異等不中以教授養親  
從學日衆范仲淹薦試太學助教嘉祐中召為海門  
主簿太學說書卒門人鄧潤甫上其所著書尤長于  
經制朱子謂李泰伯文字不軟帖氣象大段好實得

之經中雖淺然皆自大處起議論若老蘇父子得之  
史中戰國策故皆自小處起議論真知言也詩雄勁  
有氣馥用意出人云格如平易人多愛意到幽深  
鬼未知見其得處矣

魯公碑

他人工字書美好若婦女倚嗟顏太師赳赳丈夫武麻  
姑有遺碑歲月亦已古硬筆可破石鐫者疑虛語驚龍  
索雷鬬口吐天下雨怒虎突圍出不畏千強弩有海珠

易求有山玉易取唯恐此碑壞此書難再覩安得同寶  
鎮收藏在天府自非大祭時莫教凡眼覩

玳瑁石

前有縣大夫取此石為器器然夸謂予材與工俱美如  
何爾鄉人器用曾莫備無乃居荒陬俗鄙不喜事答云  
此石堅攻磨動時歲官用錢出民民用錢出已出民官

不知喜

一作  
甚

事誠可貴出已乃傷財誰能

一作  
其

不惜費

大夫聞此言如有所忿戾今已倡是詩敢以報嘉惠

秦人峰

秦法雖甚苛秦吏若猶拙山林不數里俾爾逃得脫予  
觀後世事政役火烈烈苟非為鬼神何計避羈紲聖皇  
今在御百事咸均節常披詔書意苦念生財竭誰能將  
順者所望在賢哲無使峰中人笑我民屠裂

虎跑泉

虎跑本何為彼將對以臆有如大丈夫卓爾抱剛直盜  
泉既不飲譖人亦不食山中小禽獸何足勞捉搦勇氣

無所泄爪地成遺跡地神嘉乃誠水源如開闢尋常竊  
六畜夜傍人牆壁是與豺狼同聞此宜慙色

哀老婦

里中一老婦行行啼路隅自悼未亡人暮年從二夫寡  
時十八九嫁時六十餘昔日遺腹兒今茲垂白鬚子豈  
不欲養母豈不懷居繇役及下戶財盡無所輸異籍幸  
可免嫁母乃良圖牽連送出門急若盜賊驅兒孫孫有  
婦小大攀且呼回顧與永訣欲死無刑誅我時聞此言

為之長歎鳴天民固有窮鰥寡實其徒仁政先四者著  
在孟軻書吾君務復古旦旦師黃虞赦書求節婦許與  
旌門閭繁爾老愚婦豈曰禮所拘蓬茨四十年不知形  
影孤州縣莫能察詔旨成徒虛而況賦役間羣小所同  
趨姦欺至骨髓公利未鎔銖良田歲歲賣存者唯萊汙  
兄弟欲離散母子因變渝天地豈非大曾不容爾軀嗟  
嗟孝治王早晚能聞諸吾言又無位反袂空連如

寄懷三首



鳥獸死有用羽角筋革齒輦輓入工師飾作軍國器玉  
食白如瓠瞑目已腐穢生者不敢畱埋藏與螻蟻百年  
富貴身孰若禽獸類唯有令名人終古如不死

根生但為松翼飛但為鳳王侯尚可輕道義本來重癡  
兒似婢妾寸步矜恩寵傍人忍笑時佯把衣袂弄

齷齪復齷齪淺謀同燕雀不思明日憂但取今日樂俗  
儒抱書卷未去眼中瞋誰將古人淚更為今人落

喜雨

人皆喜膏澤我獨憂豐年歲凶已賤糶年豐安得錢賦  
役忽驚駭倉廩甘棄捐銖銅苟可換富貴寧我憐歸來  
官事了相弔柴門邊農夫未盡死穀價應常然王心幸  
仁聖分職當忠賢謂穀賤為美咄咄無欺天

寄祖祕丞

我本山田人好尚與衆異平生重交游所得固無幾昨  
者應茂才西行觀朝美時當慶厯初選舉實多士茫茫  
帝王州栖栖遠行子攜錢賃破屋乞火蒸陳米鞍馬到

即賣僮僕癡難使有時造公卿努力向塵市數步則一  
歇長吁乃能起衣冠信質野言語欠婉媚閨人顧之笑  
將命見而避往往得所請蹒跚向前跪何能剖懷抱浪  
自慕尊貴貴人如天神喘息生雲氣野夫等麋鹿芻豢  
非所冀歸來坐空牕惆悵夕不睡塵埃滿鬚髻臭惡入  
口鼻業已辭吾親中道豈可廢僂僂待報聞愁憂遂經  
歲二年正月晦閒房適假寐有奴來啄門手披擇之刺  
承命驚下牀赤脚誤穿履從來未識面只是聞高第名

顯宦且達見我當何為再拜請就席熟視知可畏昂昂  
貌甚古崖石掀氛翳渾渾氣甚和璞玉無芒銳高談貫  
先哲雅意在茲世昔人相遇間一言猶合契今吾於擇  
之寧假再三計自此習往還中心蔑疑貳如熱息廣厦  
如飢享盛饋君授南康守舟維蔡河涘我館汴之陰前  
去路則通時時結帽帶踽踽尋英軌衆人嬌綺羅相對  
紉蘭芷朱絃自三歎笑殺彼鄭衛王命有期日都門一  
反袂君行劇鴻軒我處近苑繁曠日及孟秋皇慈始收

試崇崇九門開窈窕三館祕主司隔簾帷欲望不可跂  
中貴當張闌菟索徧靴底呼名授之坐敗席鋪冷地健  
兒直我前武怒足防備少小學賢能謂可當賓禮一朝  
在檻穽兩目但睥眄捉筆析所問移時數十字讀書取  
大者纖悉或靡記炙背雖自奇寧當至尊意龍馬騰天  
衢駑駘合羞死量才與揣命坦蕩更何事振衣託歸舟  
河流迅弧矢淮清江且平踰月在枕几及過廬山南聞  
君初布治舩檣既入岸馬首已來暨迎我到府署相見

共欣喜嫩橘摘千苞肥魚斫千尾蕭晨徹骨清佳境邀  
人醉高會雖暫歡故園當速至草草成別愁悠悠渡湖  
水是時東方曙俄然北風厲陽鳥畏威逃江神以儒戲  
氣象斗不同波濤大可憐長帆張欲裂孤舟蕩無倚或  
從玉井出或自銀山墜篙工斂手立脈脈無窮淚從者  
閉目坐嗟嗟不敢視我時撫牀歌分作長江鬼所恨生  
劬勞不孝而已矣禍福果無妄險難行可弭脫身得平  
康引領望鄉里厥後過挾日幸得見維梓入門何怡怡

饌具有甘旨稚女能紉針騎兒徧生齒芟除閒草萊疏  
通舊沼沚君廬可終焉生計由此始郡守方仁賢學宮  
盛修理踵門致勤恪命我論經藝麻衣何紛紛鄉人子  
若弟不唯務章句所欲興禮義施為有本末動靜有綱  
紀蚤與雞同覺夜與月相值孳孳忘飲食齟齬在文史  
時附南康書或逢北來使尺素雖滿前話言難到耳殆  
及三年冬聞君受朝寄名稱按刑獄勢可平冤滯故人  
漸大任賤子差自慰軒車日已遠翰墨益難致薄命良

可傷降災渾未已。是年之季冬。舉家纏疫癘。老母尚委頓。微軀蓋螻螳形骸。非我有魂魄。與心離。權柄在鬼物。功力非服餌。曉突誰能炊。午闕猶未啓。荏苒再週月。幸會天不棄。春風動枯槁。甘雨澆根柢。行行夏交秋。吉微凶不替。高堂何戚戚。疾病日攢萃。一夕脾臟間。發泄不復止。詰朝問無言。目瞑口齒閉。號呶諸兒孫。雜沓大鼎沸。嗟哉當彼時。誠恐弗可諱。醫師相急熱。巫覡兩經緯。藥草極酸辛。法術殫怪詭。薄暮乃復蘇。踰旬僅知味。方



茲戀庭闈旋已對獄吏試言其所由內省亦無媿有人  
同州閭發迹自徒隸竊被儒衣裳曾亡小材技突如游  
京邑欲以干明獻朝家焉可欺羈旅謀自濟乃造黃紙  
書便取青袍衣乘船歸南方斂板謁當位自言章奏奇  
因籍宦官勢詔文降自中宰府不預議既云能占天且  
曰善興利江淮一經過郡府十不啻到處爭逢迎莫能  
思處置轉運苦愛奇得之如國器故使按坑冶庶可展  
才智小人靡忖度假寵愈放肆行符索吏卒圈印發傳

遞閭閻望塵拜州縣從風靡遮道結繒綵鋪筵塞珠翠  
車騎前後呵給使數百指何者為典刑獨自誇爪觜在  
昔秦無人繞朝贈之箠繫我非聾聵碌碌寧不恥作書  
貽諫官姦詐患不細有詔令逮捕按驗取真偽是夫知  
計窮誣我以罪戾上官猶眩惑準例皆拘繫幽幽囹圄  
中憤憤爭競裏周旋二十日乃克見巧敝畫地尚不入  
叢棘曷可寘惟茲謝吾母幾不全髮體教道亦難行凡  
庸豈同志吁哉養英才徒以釣積毀篋書歸敝廬屏門

任蕪穢去年仲夏後盛暑若火熾郊園有餘爽蔬果聊  
可嗜時復觀田疇畢力奉耘耔人生但飽暖此外皆淫  
侈思君非一日欲去無雙翅俄聞遷黃州又說丁喪制  
古來聖與賢誰不遭醜詆蜀日駭狗犬夏鼎愁魑魅人  
壽有短長孝子漫憂思滅性經所貶節哀禮為是矧夫  
王佐才簡在唐虞際揚名以顯親報德豈不韙加飯苟  
如願蒼生猶有恃適時匪我長不朽乃所擬道義果弗  
充富貴反為累回憲本無官桀紂焉得此俗子但相非

吾心已居易近者游葛陂念君在衰臬作詩布幽懷讀之勿嗤鄙

女色無定美贈卿材

女色無定美寵至美則多士才無定稱用顯稱已過長  
安小家子粲粲秋池荷性慧不覺恥母憐不加訶出戶  
一囊麝見人雙眼波情動笑難止語嬌音屢訛都人口  
如沸觀者踵相摩因緣幸充選恩澤成偏頗少費萬金  
珠一呼千綺羅佯愁慘白日猛唾傾天河東鄰有賢女

春綠涵修蛾花艷不裁翦玉光無切磋自小固聞禮藏  
頭豈知他親戚尚未見媒官當奈何過時誰訪問生世  
就蹉跎豈不有配偶市里或山阿豈不有奉養春饔與  
機梭列女不得傳樂府無人歌容華日衰落涕泣坐滂  
沱富貴易修飾貧賤多笑呵柳下無仲尼小官終減磨  
進退在勇決遲疑兩皆蹉退當事奇偉夙駕追雄軻進  
當取勢位健筆為干戈胡然守一節獨自埋隨和

江亭醉後

平生尚個儻壯大苦摧折主人能結納佳境為鋪設渺  
瀕東江來谿訝暮雲裂倡女稍多藝市酒且供啜俠氣  
復何聊心朋幸相悅解冠從放蕩大呼誰輓掣咄哉千  
里足嗟呼三寸舌悔物喚龍取天葩令鬼折豔唱聲非  
雅戲談理當謫帷房笑私昵閭巷嘲瑣屑更鼓莫催睡  
夜風纔去熱俗士鮮大志于今重小節內行豕在泥外  
貌犬伏繼吾儕古豪傑方寸浴日月被謗肯自疑為歡  
顧猶拙放飯彼不慚使我無齒決

弋陽縣學北堂見夾竹桃花有感而書

暖碧覆晴殷依依近朱欄異類偶相合勁節何能安  
同時盡妖豔無地容檀欒移根既不可潔心誠為難外貌  
任春色中心期歲寒正聲尚可聽誰是伶倫官

讀韓文公駑騘篇因廣其說

主人渴良馬僕夫念駑騘行遲追易及力少牽易來時  
聞千里足百箭攢其懷主人雖欲買衆口大悠哉

蝦蟇

蝦蟇爾奚為閤閤攪人耳在官不為官在私無私事徒  
將一寸口日夜相鳴吠豈能劉語言且欲噪夢寐何者  
孔稚珪愛之如鼓吹誰論正與淫各自有知己

惜雞詩

曩予家居見雞有異者為之動心嘗欲作而不果戊  
寅夏五月學於山中乃追賦之曰

吾家有雞母來春數子生生來踰六旬互覺羽翼成其  
母且再卵逐之使離散衆雞既不來一子獨戀戀戀戀



不肯離逐之終不移母行無險易唧唧相追隨卵生亦  
云足母伏窠中宿厥子苦無依攀背如悲哭窠中母所  
安忍渴復忘餐子於背上卧不捨須臾間我時見之喜  
異類能如此因欲觀其終其終諒何似一朝大長成乃  
知北牡情膨膨娠在腹漸見東西行行行求飲食欲以  
助生息卵出子還多養子何勞役朝啄荆草林暮爪汙  
泥深昔時隨母意今作愛雛心雛生誠可愛母老寧忍  
背物性乃不常使人心歎慨物類本無知無知孰責之

斯難與衆異酷似有天資天資以仁孝變更何太早况  
彼本無知血毛安足道萬物靈者人孰不念其親少艾  
與妻子所以奪吾真五十慕父母虞舜稱稽古埋子得  
黃金邇來唯郭巨古人往莫追言之淚沾衣斯言足自警  
題作惜難詩

聞女子瘡疾偶書二十四韻寄示

昨日家人來言汝苦寒熱想由卑濕地頗失飲食節脾  
官驕不治氣馬癡如絃乃致四體煩故當雙日發江南

此疾多理不憂顛越顧汝僅毀齒何力禁喘噎寄書詰  
醫師有藥且嚼吸方經固靈應病根終翦滅但恐崇所  
為嘗聞里中說茲地有罔兩乘時相冒結嗟哉鬼無知  
何于我為孽我本重修飾胷中掬冰雪禍淫雖甚苛無  
所可挑挾疑是饕餮魂私求盤碗設盡室唯琴書何路  
致輦血無錢顧越巫刀劒百斬決徒恣彼昏邪公然敢  
抄撮吾聞上帝靈網目匪疎缺行當悉追捕汝苦旦夕  
歇慈愛早有加憶念今逾切塵勞差可畏歸計又云輟

所生能劬勞祖母矧聰哲羸卧縱未蘇撫視諒非拙勉  
勉多自安風來信勿絕

讀史

子長漢良史筆鋒頗雄剛惜哉聞道寡氣志苦不常心  
如蟲絲輕隨風東西揚一事若可喜不顧道所長公言  
絀原憲俠賊乃為良仁義謂足羞貨殖比君王黃老先  
六經斯言固猖狂吁嗟夫子沒兩觀無刑章予懷班孟  
堅駁議何洋洋傳與後世人慎思其否臧

竹齋題事

低齋結空野小竹移孤林齋閒竹淨好日媚幽人心南  
方夏厭暑獨此畱殘陰夏雨挫促夢穿風搜涼襟長茵  
展麗蘚亂歌奏歡禽待奴裹村服語客拋塵簪志高成  
利讐思爽生詩淫值聖喜盈卷感古悲入琴山迎穩履  
遠月勸澄杯深榮名雖未染幸亦非堙沈

雨中作

羣陰侮陽德雨陣春嘈嘈白曉慘成夜瓦口生飛濤凝

雲列山鞘冷氣攢衣刀徑闊有松竹庭卧唯蓬蒿花淫  
得罪隕鸞辨知時逃隰苗出水短木茵隨日高微吟雅  
於樂快飲甘如膏朱曦待未見天蓋空牢牢

閔雨詩

吳江之南是曰豐國五種之生天下食一歲不登吾民  
菜色如何天不仁縱彼旱孽稱其神矯矯赤龍推火軒  
來自東南山咸池悞水不敢沃陽侯失色愁烹煎况茲  
畎畝流涓涓何足吸之脣齒間但見禾與黍蓬勃紅塵

起土伯勅其屬埽路迎飢鬼哀哉氓蚩蚩託身釜鬲惟  
蒸炊小人怨咨君子知天生天殺今其時我聞皇穹大  
德在生育愛養萬物同嬰兒產民之身賦民食中道絕  
之何所為當時冥冥間委任非其宜山川之神各守土  
羣龍受位司天池上帝當軒親戒勅十日一雨無愆期  
帝心仁且信臨下固不疑謂言庶事有分職屏去視聽  
思無為安知愚下鬼負德孤恩難制指弄天之權侮人  
命貪嗜牛羊邀祭祀忽焉一物不稱情因教此旱災生

靈雷霆之官畏罪莫敢諫頭枕天鼓眠不醒帝在紫微  
垣下隔千里雲徒勞銜血向空哭帝心雖聖安得聞北  
斗侍帝側幹運氣母均四時五星暨衆宿照曜亡偏私  
夫何容此鬼恣行胃臆輕天威定是機務繁耳目有所  
遺小臣亦何者草莽負奇節欲係神頸無長繩欲斬龍  
頭劒鋒缺皇穹如未察凶邪空使小臣心鬱結

甘露亭詩

乾坤父母莫匪慈胚胎億兆成角羈其間哺乳不及處



有時泣殺呱呱兒南川上游號沃野景祐丙子嘗凶飢  
新田始苗舊穀罄十室八九無晨炊伏陰何者不仁甚  
釀作水災來助之烟煤刷天雨汁黑嘔山泄谷爭奔馳  
橫流一夜打城郭萬弩竊發穿毛皮東隅有洲尸揖揖  
如蟻欲走遭水圍屋根無力樹腰折蛟蜃食人猶擇肥  
濤波一望萬山阻六親不得相扶持國子劉公好仁者  
惟時假守茲軍麾民生在我不在命告舟往救無敢違  
童兒赤立婦女困載之剗木何纍纍泥沙外冷內飢渴

口噤不語如狂癡牽攀坐臥滿府舍賦以酒飲加饘糜  
隨流往往亦不死遠在百里無人知捐金購得問氏姓  
召使親族攜之歸司農倉廩盡發出待奏報先施為  
有餘況可補不足大賈蓄家如響隨來贍去察夜繼晷  
赤熱不忍蔭華棖由斯一郡十萬戶餓膚日月生膏脂  
存者相保沒者葬唐虞仁壽重毆躋聖主養賢賢養物  
氣和郁郁通高卑城西老宮古松徑一朝墜露甘如飴  
千柯萬葉結不解玉階瓊樹光離離忙俗奔走競觀覩

手攀口吮同齋咨學老之人周氏子好善不類黃冠師  
欲令事迹絢久遠築亭其地高巍巍公之歸朝不可借  
松樹至今猶未衰我作此詩揭亭上他年墮淚如羊碑

答緣慳師見示草書千字文并名公所贈詩序

佛繇西域漸中土欲使羣心皆鼓舞若顓梵語及貝書  
昧者雖存明孰與其徒往往多材能暗結時賢為外助  
遠公自昔來廬山誇逞蓮花邀社侶吁嗟君子遭亂邦  
舍此未知何處去邇來一行善記覽齧破乾坤尋歷數

或攻文苑掠芬香辭則貫休筆懷素其餘曲藝與小詩  
布在人間難悉數賢豪大抵多憐才引致門牆無齟齬  
其人既重法亦尊羽翼大成根本固我緣山谷見不遠  
緇褐憧憧盡愚魯坐量此去朋黨衰纖縞焉能拒強弩  
去年有使自番陽手藉一函來我所發函乃是緣槩書  
千字滿前雲縷縷衆人飽食已用心欲噍伯英肥美處  
當時名士嘉其能長序短篇聯繡組因思幅員千萬里  
如師之能更幾許以儒輔釋日益多何惜區區一韓愈

春社詞

并序

寶元二年嘗夢大雨震所居室驚而仆地既已有一人甚長大紫衣而冠意謂雷之神也呼覲使前授之題曰春社詞

詞或作篇字不能審

覲懼栗栗援筆得八句與之及覺尚記其首三句頗怪麗今七年矣值假日以五

句足之

吳臺翫春鎖春色雨刷花光入龍國田邊大樹啼老鴉  
野雲癡醉寒查牙年華欲住風雷惡蘭臉知秋淚先落

時榮時謝無了時扶起混沌須神醫

聞喜鵲

翩翩者鵲何品流羽毛黑白林之幽生平智力可料度  
有巢往往輸鳴鳩天然却會報人喜愚兒幼婦唯爾求  
萬聲千噪幾曾驗聞者終是軒着頭從來烏鳥愛反哺  
孝慈情性誰可傳其間於事最先見告人凶禍令人憂  
憂時不肯自修飾禱請神鬼爭啾啾告之愈驗愈見惡  
共云災患鴟之由彈丸瓦石相驅逐名園佳樹難依投

忠言逆耳世罕用屬鏤曾剖伍員喉莫笑後來司馬公  
事事稱好真良謀

秋夜

披衣坐小亭夜氣拂人清月暗先成暈蟲吟不識名舉  
杯期混沌開卷賞莖英此興知誰會松風鶴睡驚

睡思

俗語不入耳旅愁還對心坐多渾易厭夢好欲重尋暴  
雨撥蓬響殘陽過嶺陰迴看犇競苦此興貴南金

鑑湖夜泛

以明月到樽  
前為發句

明月到樽前，拏舟古岸邊。  
亂山斜入霧，遠水倒垂天。  
酒氣薰龍戲，歌聲弄鶴眠。  
迴頭嗤李郭，此外更無仙。

池亭小酌

得和字

客思都無著，臨池一醉歌。  
喚春呈物象，移性入天和。  
月影碎荆玉，波紋緯蜀羅。  
相看盡仙骨，俗態已無多。

感事

太平無武備，一動未能安。  
廟算何時勝，人生到處難。  
役



頻農力耗賦重女工寒祗有盱江守憐民不愛官

閒居

無物可勞情空郊日閉  
局雨吟春破碎貧飲客凋零  
世事重江險才名一夢醒  
同心祗松柏見我尚青青

萍

盡日看流萍誰原造化情  
可憐無用物偏解及時生  
泥滓根萌淺風波性質輕  
晚來堆岸曲猶得護蛙鳴

送張駿叟

人意皆懷土嗟君無故園欲行須盡室此去又他門靜  
裏文章好貧來節行存振淹知有日倚伏豈虛言

寄題廖說蒙亭

聖人雖在上君子有窮時自得山居樂何須世俗知夜  
多松月分涼與水風期只恐亭通去清閒却付誰

養疾

少小唯貪酒病來纔信醫問方逋客許尋藥野人疑夜  
擣全聽慣寒煎覺沸遲古賢曾愛死此意亦誰知

遠山

最能牽病眼天際一山橫盡日是秋色無人知地名暗  
時雲自合缺處路應平才子霑衣淚千秋共此情

早歸

病馬不妨騎出門常便歸見人無事說是物與心違通  
塞元關命驅馳轉覺非莫教塵裏汗壞却篋中衣

晚聞角

傾耳斜陽裏無聊拭淚頻平生慣聞處今日自愁人夜

近歇不久風來聽得真胡笳更何物只此已傷神

哭女二首

妻死女已病踰年成二喪此生誰骨肉未識好衣裳看  
面雖猶小聞言盡可傷最知憐祖母句句刮人腸  
老樹枝葉薄先秋風雨過人間不善事身外想無多理  
遣誠如幻悲來豈奈何從前短髻髮為爾漸雙皤

小女

恃汝今何恃言來淚滿襟死生雖分定襁褓累人心飢

買鄰家乳寒勞祖母針豈知泉路隔時撥蕙帷尋

龜峰精舍

去縣二十里路平時正春四山唯有石一寺更無塵融  
結疑天意經營憶古人但知安樂處何必是金身

鳴蜩

雨餘雲漏日蟲思已喧喧時節方初夏聲音似故園為  
誰吟綠野相共送黃昏便是秋來信霜髯更幾根

送春

送爾歸天去天應解禍淫物生誰得所我見獨傷心

楚詞

有目極千里傷春心之句好景吟來徧芳樽醉不禁東風別無用百

草已成林

次韻閻判官除夜

密雪穿牕入孤燈向壁光老來人不覺夢斷酒猶香世事休思慮年華任短長朽株難長育空此見春傷

寄黃晞

長憶黃夫子才高行亦淳世情輕近事見慣即常人何

力康時務將身役路塵七閩山水國是處好安貧

迴明上人詩卷

學佛有餘力吟詩過一生情閒氣淡少句好琢磨成栢  
竹門庭古冰霜筆硯清輸他飽食者終日自無營

送任大中

真偽少分別吁嗟此世情西施作老婢南郭逞新聲命  
合生來困詩應沒後名旅游何所得赤日又徒行

送何祕丞

吳人作蜀官萬里汴驚湍地俗雖云異民情想一般智  
明終戒察政惠不須寬前史多循吏乘閒更熟看

鄉思

人言落日是天涯望極天涯不見家已恨碧山相阻隔  
碧山還被暮雲遮

少年

新翻曲調恐人傳不許高聲唱玳筵金獸也嫌春態淺  
向風噴作綠楊烟



自勉

月欲東生日又西  
莫隨兒女醉明時  
黃泉一向理愚鬼  
不與人間史筆知

戲題玉臺集

江右君臣筆力雄  
一言宮體便移風  
始知姬旦無才思  
祇把豳詩詠女功

雪中贈柳枝

暖氣來時柳眼新  
一場冰雪更愁人  
要知真宰無誠信

取次東風未是春

柳枝答

春早寒餘豈足哀平生多難媿非材去年二月都城裏

曾共花房帶雪來

慶曆二年二月五日京師大雪

讀長恨辭二首

玉輦迢迢別紫臺繫環衣畔忽興哀臨邛漫道蓬山好

爭奈人間有馬嵬

蜀道如天夜雨淫亂鈴聲裏倍霑襟當時更有軍中死

自是君王不動心

戚夫人

百子池頭一曲春君恩和淚落埃塵當時應恨秦皇帝  
不殺南山皓首人

有感

官家的的要寬征古時什一今更輕州縣酷嫌民漸富  
幾多率斂是無名

白刃劫君君勿言人生禍難俱由天君家歲計能多少

未了官軍一飯錢

庭下縲囚何忿爭  
刀筆少年初醉醒  
黃金滿把未迴眼  
笑殺迂儒欲措刑

遊寺醉歸却寄同坐

江村古寺偶閒行  
一飲全疑酒有靈  
水底屈原應大笑  
我今獨醉衆人醒

索酒

不醉多愁醉多病  
幾迴愛酒又停杯  
死生若是有天命

莫放愁來任病來

憶錢塘江

昔年乘醉舉歸帆  
隱隱前山日半銜  
好是滿江涵返照  
水仙齊著淡紅衫

謝傳神平土人

叢陋徒煩妙筆傳  
呼兒看了獨凄然  
丹青不解隨人老  
相似都來得幾年

閏正月三日偶書二首

一步寒郊一慘眉  
望春春色苦來遲  
東君未必私桃李  
只恐梅花謝有時

無賴年年逐酒徒  
今年不飲興何如  
醉鄉若有人名籍  
但願春風點檢疎

論文二首

令人往往號能文  
意熟辭陳未足云  
若見江魚須慟哭  
腹中曾有屈原墳

天寶年中事事新  
長安還有謫仙人  
騎鯨去後無尋處

輸與句芒自管春

漢宮

哀平外立國權分只為當時乏嗣君  
試問莽新誰佐命最應飛燕是元勲

燕雀二首

燕子從來巧語聲  
主人相愛是常情  
黃頭老雀何能解  
飽食官倉過一生

繡戶珠簾見最頻  
暖來寒去但安身  
翟公門下時飛入

全勝交情斗頓人

送春

宜春臺上送春歸  
淚滴金杯不自知  
懊惱黃鸝解言語  
飛來唯見落花枝

曉角

腸斷城頭畫角聲  
燈青月黑酒微醒  
濃香夢裏誰曾管  
只有離人夜夜聽

登越山



臘後梅花破碎香望中情地轉淒涼遊山只道尋高處  
高處何曾見故鄉

送古山人

喜聞吉事怕聞凶天下人心處處同乍出山來言語拙  
莫將刺字謁王公

送毗師西遊

望望王城十二門青山行盡入紅塵近來富貴皆天與  
到處應多問命人

送春寄呈祖袁州

去年春盡在宜春  
醉送東風淚滿巾  
今日春歸倍惆悵  
相逢不是去年人

酬陳屯田途中所寄

封豕長蛇戰嶺南  
何人肉食不懷慚  
只今惟有高眠好  
風弄松聲水濺菴

正月二十日俗號天穿日  
以煎餅置屋上謂之補  
天穿感而為詩

媧皇沒後幾多年  
夏伏冬愆任自然  
只有人間閒婦女  
一枚煎餅補天穿

苦雨初霽

積陰為患恐沈綿  
革去方驚造化權  
天放舊光還日月  
地將濃秀與山川  
泥途漸少車聲活  
林薄初乾果味全  
寄語殘雲好知足  
莫依河漢更油然

野人

村落蒼茫半草茅  
路無車轍水無橋  
婚姻取足唯春繭

鹽酪歸來待晚樵一樣寬衣疑效古幾人華髮未經徭  
相逢不會寒溫語借問官家合是堯

書麻姑廟

流俗好仙方學道至人樂道自成仙飛昇若也由貪欲  
紫府還應用詐權塵裏笙歌千古夢洞中星斗幾家天  
無心便是歸真日姹女河車總漫傳

客有話故丁秘監京師舊宅因而傷之

等閒榮謝已愁聞况話三公極寵身青史尚為今世事

朱門不是舊時人文章散入諸蕃口  
花藥畱添上國春  
生死交情渾易見有誰過此為霜巾

五龍塘

世傳鱗物有蟠時分得寒泉住翠微  
天命雖教為潤澤  
神心終是索虔祈一圍石岸刊無迹  
幾族陰雲禁不飛  
風脚斗回波面黑向人渾似逞嚴威

寄小兒

兩世煢煢各一人

予無兄弟才生此兒三歲矣

生來且喜富精神欲

教齟齬從師學祇恐文章誤爾身但有犁鋤終得飽莫  
看紉綺便嫌貧不知別後啼多少苦問家僮說未真

秋懷

褚冠斜頂對清秋病骨支撐懶上樓輔世功夫何日是  
少年滋味此生休山含紅樹隨時老天帶黃昏一例愁  
自笑酒腸空半在前村無處典鷄裘

書松陵唱和

天命相逢陸與皮當年才調兩權奇朝端未有輸忠處

詩外應無用力時  
意眇直摩軒昊頂  
言微都洩鬼神私  
近來此道中興也  
泉下英魂知不知

早起有懷

草草西風動葛衣  
呼僮前啓竹間扉  
山僧好睡鐘聲晏  
社戶多貧酒氣微  
豈是客愁渾較可  
祇因書卷解忘歸  
盱江百里清無滓  
枉屬閒人坐釣磯

清明日作

遲遲日景坐成曠  
聞說清明在此晨  
花卉不宜愁眼看

句芒能為幾人春銷磨志氣多因老點檢交遊半作塵  
欲向醉鄉聊自適病來還厭舉杯頻

晚思

一檻東風小箔開亂山明暗水縈迴流年漸共春華去  
暴熱還隨霽色來天氣濁多人欲睡地形卑甚物先梅  
因知楚客迷魂處不是江東不足哀

暮春始遊城西

病多無力逐紛華三月衡門未見花長恐後期成索寞



果逢殘景獨咨嗟  
欄干倚望山空在  
杯酒遲留日易斜  
漫說明年更春色  
不知園囿屬誰家

寄傅代言

交遊散盡客來稀  
門掩城隅晝漏遲  
春地更無嫌草處  
雨天還有詐晴時  
輕量世事世不罪  
冷笑人言人豈知  
猶喜道途收拾早  
將閒對病最相宜

丙子冬至夜酒醒

盡道一陽初復時  
不期風雨更淒淒  
凌人出去逢人飲

沈醉歸來滿馬泥，多恨恐成干斗氣。欲言那得上天梯。  
韓文公月蝕詩有無梯可上天之句燈青火冷睡半醒，殘葉打窻烏夜啼。

南齋詠風

懊惱南牕一道風，只應天配與貧窮。不歸羅綺飄飄處，  
故入松篁冷淡中。久坐披襟塵榻穩，半醒吹面月帷空。  
城邊菡萏知多少，偷得清香是爾功。

小雨

已是蛟龍未肯忙，誰教蟠蛭更相妨。來時槁葉疎疎響，

過後浮雲片片光  
徑草微滋垂粉汗  
砌沙圓滴簇蜂房  
嗟予不及高飛鳥  
先得天邊幾點涼

題淨居院

寺門幽獨傍江城  
江水清含地氣清  
隔岸樓臺人醉死  
遶階松竹夏寒生  
路經橋遠塵難過  
僧占閒多俗不爭  
唯有行吟憔悴客  
這迴須去濯長纓

往山舍道中作

截竹成輿不用輪  
東行盡日穩宜身  
前看疊嶂如無路

每到平田始見人下戶半曾差作後朽株多已祀為神  
生涯一撮誠何有且免庸兒共拜塵

秋晚悲懷

漸老多憂百事忙天寒日短更心傷數分紅色上黃葉  
一瞬曙光成夕陽春水別來應到海小松生命合禁霜  
壺中若逐仙翁去待看年華幾許長

殘葉

一樹摧殘幾片存攔邊為汝最傷神休翻雨滴寒鳴夜

曾抱花枝暖過春與影有情唯日月遇紅無禮是泥塵  
上陽宮女多詩思莫寄人間取次人

哭十姪

到官六月

一作日

寄書迴未病封題死後開一命至卑人

盡得九泉何事獨相催唯憂旅櫬還鄉遠况是親喪繼  
踵來數世學文終若此可憐門戶轉隳頽

秋陰

一夜風聲曉更狂起來庭戶頓淒涼不知紅日在何處

時見黑雲微有光  
天落水中兼雁影  
露啼林罅帶楓香  
愁人莫苦登高閣  
說著江山已斷腸

寄介夫

天恨吾儕各一方  
夕陽千度到西牕  
因循流落今皆是  
磊落如君信少雙  
書未隔年難得報  
心從薄宦始應降  
可憐漢水無拘係  
長與盱江會九江

書懷寄介夫

棄材幸免雜與薪  
收拾緇衣出洛塵  
漸老得閒纔是性

漫言成謔且隨人能傳身後須文字要識胸中只鬼神  
俗子不勞輕毀譽問天長乞醉鄉春

俞秀才山風亭小飲

炎炎千室熱如烘亭壓山頭獨有風雨意生穉雲彩黑  
秋容細碎樹枝紅半天斜日歸心動一面平川醉眼空  
却是夢魂無所得人間豈少翠微宮

閩中歲暮

休道南人暖過冬苦寒令與北方同霜巖欲裂地到底

日短不行天正中誰使智愚相伴老便將榮辱斷還空  
鄉愁莫更欺閒客薄酒從來亦有功

白樂天有  
酒功贊

偶題饒秀才谿光亭

北出城來駐馬蹄君家別館幸臨谿雄虹見雨過不斷  
潦水到秋痕漸低萬事熱心成浩歎一樽撩眼怕長迷  
俗人誰會儒生意是處醉吟還日西

早夏偶作

閒愁不覺過年光強半精神似醉鄉幾度雨來成惡熱



有時雲斷見斜陽  
古人事業塵空滿  
故園林草自長  
賴得南華憐我病  
一篇齊物勝醫方

自解

人生何苦要多才  
百慮攢心摘不開  
夜月幾曾無夢處  
春風只管送愁來  
禿毫強會悠悠事  
浮世無過滿滿杯  
看取秦坑烟焰裏  
是非同作一抔灰

不寐

四壁空空絕語聲  
困來終是睡難成  
孤燈要與人相背

寒漏苦教天不明累月故園無信息幾般閒事惱心情  
別愁若解生華髮一夕應添一萬莖

韓偓集有自撫州往南城縣舟行見拂水薔薇之  
詩南城吾鄉也因題八句

韓偓當年赴七閩舟行過此倍凝神江邊石上知誰處  
綠戰紅酣別是春往事幾多書不記仙源依舊地無塵  
花光柳色今何限更有才人勝古人

送王都曹

古木亭邊夜嚮晨  
餞壺重疊擁雙輪  
高文健筆科場手  
白髮青衫宦路人  
十月霜風還劈面  
六街塵土會欺貧  
麻源碧澗神仙地  
早晚歸來伴隱淪

蓬屋

長簷數尺庇堂東  
疎漏從來只有蓬  
日影碎如秋樹下  
雨聲初似夜船中  
竹經蠹了多垂地  
箬到乾時半捲空  
此處想非人所競  
衆言千萬莫相攻

階基

堂前一級似階墀無石無甃只舊基泥飭頃因年節近  
蹋崩唯是客行時誰曾羅襪雙來上多謝蒼苔久不離  
從此便成貧景致竹簾垂處敢相宜

宜春臺

謫官誰住小蓬萊唯有宜春有古臺千里待看毫末去  
萬家攢作畫圖來雲中羅綺香風落月底笙歌醉夢回  
莫怪江山苦相助騷人沒後得真才

東湖

古郡城池已瞰江重湖更在郡東方水仙坐下魚鱗赤  
龍女門前橘樹香路絕塵埃非灑掃地無風雨亦清涼  
使君待客多娛樂只有醒時覺異鄉

野意亭

福唐城郭掌中窺旭日登臨到落暉誰在畫簾沽酒處  
幾多鳴櫓趁潮歸晴來海色依稀辨醉後鄉愁積漸微  
山鳥不知紅粉好纔聞歌板便驚飛

靈源洞

繞出塵來尚未知漸攀藤竹漸臨危伏流似是龍藏處  
古樹應無春到時誰把石厓齊剗削直教雲氣當簾帷  
良工畫得猶宜秘莫與凡夫肉眼窺

送黃承伯

君來別我向番陽時節初春曉尚霜茶褐園林新柳色  
鹿胎天地落梅香此行硯席多知已是處樓臺可舉觴  
只恐詔書非久下槐花又在眼前黃

清話堂詩

至和元年秋九月與周伯達宿景德寺義明上人房  
予憇誦李涉詩云無限心中不平事一宵清話又成  
空其意與今夕相似因目其處為清話堂且題八句  
釋子相延暫解冠一宵清話到更闌漆盤香燼死蚯蚓  
紙瓦雨聲鳴彈丸往事莫將聞口笑勞生誰在定中看  
明朝顙面還歸去依舊塗泥濺馬鞍

次韻酬屯田陳丈見寄

老年纔到病還催老病成叢撥不開腹冷有時如咽雪

耳虛終日獨聞雷  
半生辛苦歸三徑  
萬恨銷磨向一枰  
賴得竹牕無事處  
清風頻共故人來

宋詩鈔卷四十四



欽定四庫全書

宋詩鈔卷四十五

內閣中書舍人吳之振編

王炎雙溪詩鈔

王炎字晦叔新安婺源人所居武水之曲雙溪合流  
因以為號矣登乾道進士始令臨湘受學於南軒先  
生入中都官博士慶元四年為實錄簡討尋轉著作  
佐郎出守湖州年八十餘著有雙溪集炎詩頗為世

所稱許然亦多庸調今擇其刊落者入鈔

遊硯山

壬辰

他山石徒多器寶匿幽僻產璞芙蓉坑金聲而玉德岡  
巒外鉤聯地勢中斷隔曲塢八九家路入羊豕迹澗水  
抱石根石骨多紺碧北山上攬天南山勢蟠伏硯工二  
百指日鑿崔嵬腹篝燈礪斧斤深入逾百尺我行冒風  
雨周覽不知夕夜宿茅茨下青燈照岑寂酒闌呼匠氏  
訪之語纖悉冰蠶吐銀絲蛟人織霧縠巧手琢磨之價

直黃金鎰斷崑半傾歆舊穴久湮塞苟求得他材飲水  
不受墨堅滑已支庶麤燥乃臧獲信知天壤間尤物神  
所惜罕見因為貴有亦未易識璫玉混一區語盡三歎  
息摩挲蒼蘚崖此言可深刻

春日遣懷

感懷細數十年事養拙略無終日閒景物自新春稍稍  
吾親漸老髮斑斑豈曾有夢到天上且任此生浮世間  
願約漁樵同小隱謂予不信有南山

麥苗已有生意掘烏稷者未止

兒童飯犢女採桑水滿東臬耕事忙稻秧半綠麥半黃  
天許食新饘粥香田父咨嗟仍笑語赤地一年今得雨  
紫鰲有根妻子喜免填溝壑棄閭里

元日書懷

年光除日又元日心事今吾非故吾兩板不須書鬱壘  
一杯亦強飲屠蘇添丁解事尋王母內子傷時念老姑  
欲報情深恩罔極不終反哺愧林烏

送游大冶歸建陽

西風來鴈歲欲晚  
衰柳鳴蟬人語離  
市道交游何足數  
君家父子總相知  
讀書要見古人意  
立事正須年少時  
話舊班荆尚無日  
莫忘苦語有箴規

生朝無以自慰作畱貧薦一杯

私居飯半菽  
官舍食無肉  
何乃太清生  
囊無一錢蓄  
人言骨相寒  
有智不如福  
貧者輕於葉  
富者重如玉  
輕重信然否  
世情手翻覆  
相彼守錢虜  
無厭溪壑欲  
口不談

古今枵然瓠壺腹渠固笑我癯我亦笑渠俗珊瑚數十  
株胡椒八百斛冥冥鬼瞰室一跌赤其族未若貧而安  
高枕睡常熟我家雲溪陽欹側數椽屋屋後蔕菰屋  
前種梅竹室中四立壁但有書可讀世故驅我來營此  
升斗粟仕不上青雲何如返耕牧頗怪草玄翁乃謂貧  
可逐卒歲一布裘終朝一饘粥此外何所求吾生無不  
足

用前韻答黃一翁二首

縕袍敵狐裘晚飯可當肉諱窮竟未免豈不愛儲蓄嗜  
利額有泚恐愧王承福財固禍之媒越鄉忌懷玉君看  
座右器已滿即傾覆聖賢用功處清心而寡欲於世淡  
無求乃能實其腹誰令著青衫失策混流俗黃子振鷺  
姿筆力扛百斛笑人龜手藥欲售先聚族知余頗清苦  
應物未圓熟宦游不能巧俯首立矮屋鍛鍊知精金祁  
寒見松竹自立不堅定庸行徒聖讀誰謂漆園高俯首  
欲丐粟窮作扣角歌老厭淄川牧古道寢斷喪時人方

逐逐有田南山南可辦一盂粥請賡歸去來世路早收足

豆羹采藜藿鼎食厭梁肉士欲齊得喪宵次要涵蓄我  
晚頗聞道寧有慧無福外物皆浮雲此道等珠玉閱事  
如閱碁已過安用覆回光照諸妄稍稍淡無欲與君共  
玄談一笑時捧腹吾作詩畱貧此語頗驚俗細看苜蓿  
盤豈減檳榔斛見金不見人渠輩非吾族君獨臭味同  
吾固知之熟平生求益友今日並牆屋不肯兄事錢寧



以君呼竹力學追古人經史費抄讀我方病少瘳擁納  
膚有粟百念漸灰冷有牛不須牧君如汗血駒墮地必  
馳逐甘為走踳踳恥作雌粥粥有玉未嘗獻豈憂終刖  
足

公檄如蒲圻訊民之食菜事魔者作詩憫之

三代日方中為民破重昏既蝕復光融孔孟道益尊古  
禮今則亡陳編意猶存飲燕用觥籌薦享羞羔豚瞿曇  
何為者髡首徒實繁不飲非畏義不殺非知仁舉世昏

不悟跣足行荆榛胎禍產妖幻與佛岐又分俗愚有累  
誤吏議多深文怒言必溢惡疑似恐不根黔首亦何罪  
可憫不可嗔大道若返古怪說難眩民帝居虎豹守此  
語誰扣閭

和游堯臣勸農韻

傳呼穩筍筍興行喜見漫山麥浪平道上老農皆好語  
年來瘦地有新耕草深黃犢陽坡暖雨過青蒲野水生  
桃李陰中春事好田家雞犬亦歡聲

到胡道士草菴

清風颼颼竹萬箇白日寂寂茅三間  
春深只有鳥呼夢地僻略無人叩關  
豈但壺中堪避世也勝圖上可遊山  
出門回首不能住輸與道人閒復閒

出郊雜詠四絕

閉戶不知春色佳柳稍欲暗可藏鴉  
鴨頭新綠齊腰水女嬃輕紅刺眼花

道上東風掠面輕一犁雨足得新晴  
草頭蛺蝶自由舞

林下鷓鴣相對鳴

孤烟近見數椽屋急水時行獨木橋入眼異鄉風景別

修眉一秣暮山遙

雲昏山色收圖畫雨過泉聲雜管絃馬上得晴春滿眼

好花迎客亦嫣然

旅中思家

野田既雨水皆滿山路無風花自香且復將身供世事

也能隨處對春光絕嫌俗物眼多白未辨生涯髻已蒼

待看楮梨麤可教老夫耕釣即韜藏

晚憩田家二絕

家書未到鵲先喜春事無多鷺又啼偶對好山畱客坐  
綠陰遮屋日將西

山間一徑牛羊迹林下數家雞犬聲底事居人苦爭畔  
閒田官正募民耕

上巳

莫春祓禊好天氣不到水邊流一杯旋擘紅泥嘗煮酒

自循綠樹摘青梅  
淹留異縣客多病  
迢遞故鄉書不來  
歷歷舊時行樂處  
凭欄小立首空迴

過浯溪讀中興碑

日光玉潔元子辭  
銀鉤鐵畫顏公書  
百金不憚買墨本  
摩挲石刻今見之  
猗那清廟久不作  
其末變為王黍離  
春秋一經事多貶  
魯頌四篇文無譏  
漁陽鼙鼓入潼華  
公卿徒步從六飛  
朔方天子扶九廟  
京師父老迎千麾  
紫袍再拜謁道左  
上皇萬里旋鑾輿  
北味鳴晨有悍婦

孽狐嗥夜有老奴扶桑杲杲未翳蝕但歌大業吾何疵  
首章義正語未婉前者不辨來者疑正須細讀史克頌  
未用苦說涪翁詩許張勁節震金石李郭壯武如虎貔  
斷崖蒼石有時泐諸公萬古聲烈垂天憐倦客有所恨  
雨溼江寒催解維神州北望三歎息翰墨是非何議為

湘中雜詠三絕

有懷丹水柳司馬更憶涪溪元道州仕宦兩公俱落莫  
斯文千古共傳流

順流鳴櫓不論程上水開帆取次行逆順自從人意轉  
風生波湧本無情

中流四顧浪花平雙櫓夾船鶩鸕鳴欸乃聲中山水綠  
不妨緩緩計歸程

豐年謠五首

滿箔春蠶得繭絲家家機杼換新衣五風十雨天時好  
又見西郊稻秫肥

縱橫南陌接東阡婦餉夫耕望有年前此丁黃饑欲死



今年米賤不論錢

洞丁徭戶盡歸耕  
篁竹無人弄寸兵  
要識二天恩德廣  
黃雲千里見秋成

睡鴨陂塘水慢流  
離離禾稼滿平疇  
共言官府催科緩  
飽飯渾家百不憂

稻如馬尾覆溝塍  
桑柘陰中鷄犬鳴  
收穫登場便無事  
輸租人不入州城

再用元韻因簡縣庠諸先輩

書生卯飯動及午薑糝菜絲煩自煮異時甘脆屋渠渠  
出自空腸千卷書竹間杵臼相敲擊茶不療飢何苦喫  
泉新火活費裁排呼奴更挈銅餅來蜀客見之心逐逐  
暫借紙牕休繭足歸歟家在淮湖邊草魁可買無青錢  
不辦雲腴供粥飲空有束詩如束筍青箸小分鷹爪香  
江上挈舟當遠引

江上為韓毅伯訪得便舟

銅墨纏腰雪上頭人生一飽亦難謀天明忽暗釀梅雨

風暖又寒催麥秋老矣不堪時節換粲然方幸故人畱  
白雲呼去淮山住強為江邊問買舟

解官到郡諸丈置酒岳陽樓招炎為客鄧巴陵索  
詩

重上危樓覽洞庭故人一笑對飛觥君山只似鵬山綠  
江水不如湘水清一日勝遊成樂事三年俗狀奪詩情  
天涯解后還離別莫惜尊前底裏傾

和程丞遊清水崑黃龍山韻

嵐光野色共扶輿見說壺天氣象殊疊巘吞雲圭角露  
寒泉觸石篆文紆荒涼佛屋存遺像窈窕山崑有別區  
何日青鞋親扣厯細評佳致染松腴

和陸簿九日二首

西風拂面飲微酣小摘茱萸手自簪極羨酒兼詩共好  
正緣人與景相參杜門不復貪游賞落帽無山際劇談  
歎息登高兄弟遠目隨鴻鴈過天南

風露蕭蕭木半黃老來淡薄似秋陽一樽冷落思佳客

九日淒涼在異鄉採菊何心追靖節哦詩無語答仇香  
危臺戲馬今安在休惹清愁攪石腸

題童壽卿博雅堂

會道莫如約要識曾中真講學亦貴博不廢紙上陳王  
充與李邕世豈無若人中秘未許見市肆何所聞童君  
家多書乃為我輩慮安用蓬萊山萬卷皆此聚又復附  
益之秦碑及周鼓刻溪來楮生歛穴會石友持此分雅  
俗清渭映濁涇不賄屋自潤無爵身亦榮好事時相遇

不憚倒屣迎揮麈言有味寂如無市聲孰如漢中郎孰  
似楚左史孰能誦亡書孰解作奇字是中猶淵海隨取  
即隨有或問賈幾何還可商度否掀髯笑謝客吾非鬻  
書叟

題遠山平林圖

山色微茫疑有無木葉半脫殊蕭疎雲根更着數椽屋  
此屋當有幽人居墨妙逼真乃如此畢竟非真惟近似  
何如履齒飽經行是處溪山皆畫筭還君圖畫吾且歸

家在江南依翠微

用元韻答劉判官

解后漳江上知從五馬車君才猶未用吾老更焉如間  
澗思翁字殷勤得手書喜聞衣綵樂入饌有江魚

冬雪行

并序

甲寅歲雖小稔縣官和糴米價遂增兩日雨雪市中  
貧民有無炊煙者艱糴反甚於去年之凶歎父老輩  
遂具公牘赴訴于庭因成冬雪行一篇其辭如古樂府

其義則主文諫言之可以無罪者也

擁衾展轉夜不眠細數更籌知苦寒角聲未動紙牕白  
兒曹報我雪滿簷玉妃翦水出天巧飛花萬點爭清妍  
朱門貴人對之笑初見一白來豐年金罌玉爵扶春筍  
飲罷敲冰煮新茗綉緯中有紅麒麟輕暖勝春尚嫌冷  
窮巷小家真可憐典衣糴米無炊烟江頭津吏日來報  
往往上流無米船縣官要糴十萬斛天上符移星火速  
去年秋早糴陳腐今年秋熟米如玉且願扶桑枝上紅



日轂東來却勝六今年冬雪民已臞明年春雪民更饑  
九關有路虎豹守欲語不敢空長吁

次韻答簡簿

少日牛衣嘗熟眠老來駝褐不護寒欲呵龜毛拈秃筆  
怯看冰柱縣疎簷東風不解著梅柳翻作六出欺春妍  
春回臘盡亦何好但為浮生添一年負郭有人如石甯  
雪裏哦詩自烹茗甯中盎盎有天和戶外蕭蕭尚冰冷  
日炊脫粟不自憐却念野廬無爨烟此憂未知可解否

準擬為君浮酒船酒酣傾瀉珠百斛定覺揮毫轉神速  
聞道諸公雙眼青豈終遺此豐年玉倦游別駕老更貧  
自謀慚似龜藏六詩來謂我清而臞我方忍慾將忍饑  
短蓑歸釣寒江雪紛紛世事休嗟吁

題徐參議所藏唐人浴兒圖

右相嘗慚呼畫師技癢仍復拈毛錐逼真誰作此贗本  
亦有妙意生妍姿中庭燕坐必主婦綠雲高髻香羅衣  
嫣然嬪妾左右侍前浴能言丹鳳雛娉婷及笄女公子

素腕擁項相攜扶兩兩為朋四髻鬪乳盧隨逐相諧嬉  
掌中看珠二少艾捧顙却立鴉鬟奴屏間擁膝袖玉笋  
疑是夢闌顰翠眉側身背面按箏者冰肌綽約不自持  
牀前跪起各姝麗為兒理髮拭涕洟有犬爛斑受摩撫  
與人習熟無猜疑梳裝淡薄服製古如見永徽貞觀時  
若非侯家及主第人物無此美且都荆釵布襦小家婦  
生子不如山下麋

題徐商叟所藏李伯時四天王圖

龍眠有巧手幻出汗血駒老衲或戒之回向心地初遂  
畫白衣仙斲與梵釋俱北方四天王亦附瞿曇居雜以  
馬龍像宿習終未除四王名字異且復形狀殊信者謂  
其有疑者意其無蕩蕩天門高誰能凌空虛何以信不  
疑取諸貝葉書予不語怪神從釋恐畔儒語之且不可  
筆之其可乎因畫議及此於公意何如

即事

時寓  
清化

久轍囊中句時看肘後方有家如旅舍無事似僧房梅

白牆頭笑櫺紅甕面香杖藜如可出溪上探春光

勸農道場山

練日遵詔條行春勸耕事擁旆有傳呼據鞍小馳驚兒  
童喜聚觀父老歡來詣松徑度坡陀蓮宮得清閱此行  
非遨遊所職在撫字示之淺易語諭以丁寧意扶杖既  
言歸解衣聊少憩山中無俗情物外有幽趣僧閒衆所  
羨農困吾甚愧不敢飽登臨肩輿下山去

夜半聞雨再用前韻

輓轡百尺汲無水映日四山雲不起朱轡浪說勸農桑  
衣食何從可甘美禱而得雨不苦旱竊疑此殆偶然爾  
夜半潺潺簷溜鳴孤枕夢回心失喜兒童挽犢婦餉盂  
襁褓耕夫亦勤止鼠跡印我榻上書蛛絲胃我壁間塵抖  
擻胸中三斗塵強欲哦吟無好語請公酌酒更揮毫快  
寫珠璣歌喜雨

雙溪種花

雙溪漸有雜花開每日扶筇到一回勝似名園空鎖閉

主人至老不歸來

蒼頭為我斲西山扶病移花強自寬縱不為花長作主  
何妨留與後人看

舟行過白石見將使夜宿毛家林翌日到葦莪却  
回和靖老

蒼頭倦晨炊卯飯幾及午泝流赤日中舟子亦良苦魚  
躍戀芳餌鷗飛避鳴櫓仙翁所退藏好境自呈露溪水  
清可鑑山雲橫不度坐斷泉石幽不受塵土污問之何


所得妙處難悉數初非練玉泉亦不鳴天鼓人癯道方  
肥心遠貌亦古老衲同我來得句時一吐物色盡詩材  
筆底隨指呼行行更前之繫纜日未莫轉柂涉奔湍支  
筇入幽塢倦甚宿茅茨睡熟不能寤遲明又蓐食凌風  
上前浦重露雨點疎晴嵐雲氣布蝗蝻尚飛揚禾稼難  
愛護村落有狗偷耄倪且狼顧念此一悄然回舟雙港  
渡空羨皎然師詩成有神助

病中書懷

丙子



霍骨鷄膚不耐寒那堪癰疥更斑爛開年慘淡陰兼雨  
終日抓搔寢不安未可給扶親几杖豈能見客攝衣冠  
人言剝復相更代頻把韋編反對觀



宋詩鈔卷四十五